

Ni BIONN guehtzy ni bzaa San JUAN

Ni mos ni rtzoo mpyquie ni lé Gay

¹ Naa, to mînguhl, gashaala' guetzy-rie' lo'y, rman-Gay, ni ndzin lee no ni uli.

² Rman, lii ni ndzin lee, rnaba' lo Dioz gyreu gyruquenoyu mos no tzuy nza'g, scâsy mod-nu xguîmbahñi' mos lo Dioz.

³ Modni byxihlya' hor-biahd lahd meññ-rman no bie yâme diidz dlo'n nehx rxiiñladzyi' de ni ulihbu rtzooy ni nac xñahzû, sca-ze ba nuy lo ni nac ni uli.

⁴ Nehx nu sto guîlrxihly ma xro' par naa ru rieñña' de ni rman yahc ni zidguiahc beeiy gahc dshiña', nu yâme lo ni nac ni uli.

⁵ Rman, lii ni ndzin lee, mos rtzooy hor-racnoy zrieñ rman yahc, no mahbu ni nac meññ-zrieñ lad ni nehx rzaclo'y lee.

⁶ Leeyâme bie diidz lo xmeññ Jesucrist ne', mod-bintziy leeyâme. Rnaba' gacnoy leeyâme no ni yquihñ yâme lo ñahz, scâsy mod-racladzy Dioz, lehdy gydziñ yâme ru za yâme.

⁷ Porni byruu yâme, za yâme gatzooy yâme xtziñ Jesucrist, no nehx rca' yâme mbehty ni niscady meññ-nehx rlîladzy Dioz.

⁸ No leewe racladzyu di gboo dihqy nó leeyâme, lehdy beeiy gacno nó lo xtziñ yâme de ni runo yâme meññ ni nac ni uli.

Nehx mos rtzoo Diótréfes

⁹ Naa ba bzan to guehtzy, pshaala'u lo meññ-idoo; per Diótréfes, ni riu'ladzy ctzoo mdad, nehx rtzoo me ni ne no'.

¹⁰ No leewe, bâl tzan ru nu la'd, gynin ni gatzoo me. Risquiee me dchesh no' no didz-nahcsy; no nehx riahcladzy me no niwéhzy, ni nehx rlaby me meññ-rman ni rdzihñ yahc; no rman ni riu'ladzy gylaby meññ-gadzihñ la, nehx rdee me ñahz, no rboo gahcme lee de lahd meññ-idoo.

¹¹ Rman, lii ni ndzin lee, di sunáli' ctzooy ni nahcsy, mazyg ni mos ptzoo. Dxu rtzoo ni mos, wé we de Dioz lee; no dxu rtzoo ni nahcsy la, nehx rzaclo me Dioz.

Mos rtzoo Demetyr

¹² Gyre meññ ni nu ne' ru yâme diidz, Demetyr mos rtzoo me, no ni uli gahc rdee diidz de leeme. No zegahc no' rdee no' diidz de leeme mos rtzoo me, no lii nanni' ni rnii no', ni uli we leeu.

Diidz ni dzigylux guehtzy

¹³ Rapa' xtahl ni ñapya' lii, per nehx neu naa gzanu lo guehtzy;

¹⁴ porni gabiaaza' ngueely gydziehñ dzé güien lii no gu nó diidz nó yo'by.

¹⁵ Gacno Dioz lii lehdy tzuy dzie tziaawy. Rman yahc ni nu ne' gashahl yâme diux lo'y. Bdee diux cad to meññ-rman ru nuy.

Zapoteco, Guevea de Humboldt NT
Zapotec, Guevea de Humboldt: Zapoteco, Guevea de
Humboldt NT (New Testament)

copyright © 2019 Wycliffe Bible Translators, Inc.

Language: Guevea De Humboldt Zapotec

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

17fbc940-b18e-5406-acd3-79c87c6191a7